

LAI SIANGTHO HOLIM NA

Volum.15

Rev: Suan Khan Thang (Mualpi-Tonzang)

Motto: Matthew: 18:20

mail to: suankthang@gmail.com

Date: 24/ 3/ 2013

Psalm 39: 8 Ka thupalsatna khempeuh panin kei hong honkhia in la, mite nuihsat in hongbawl kei in. Paikhiatna 20:13 Mi that ken, Nu leh pa mawhna bawl ken, Paikhiatna 20: 17,Na vengpa zi deih gawh ken.

Pasian tek tek mahin thukham suangpek tungah ngeina lopi in nu leh pa mawhna (sex) bawlo ding ci hi. Tua bek thamlo in, mi that lo ding, mi zi deihgawh loding', cih. Tua thukhamte a khial khat a kimuh leh mit muh teci nih bang thum bang a om leh suang tawh kidenglum ding hi.

Jesus leitung a vak laiin nu mei khat leh pasalkhat a mawh laitak ki man hi. A pasal bel tai veng veng thei pah hi in teh,kampha bilbel.A numei kiman in ong kikai hi. Zong kamsia cit ciat sa ing. Jesus khiangah ong ki puak hi. "Moses thukhamin numei leh pasal mawhna a bawlte sung tawh denglum ding ci ven, nang bangci ngaihsut na hiam?Topa aw," a cih uh ciangin Jesus in kunsuk in leilak ah mi mawhna teng kui zeuh zeuh in' tua teh "note lak ah a mawh lo penpa in suang tawh deng masa ve vua leh" a cih ciangin a deng ma sa ding ki tuh lo in, Absalom gal zawhna panin a ciah te bang in gel mang sit set uh hi. Tua a hih ciangin a ciah khempeuh zong suang tawh denlup ding aa ki lawm teng hi ve ve ding hi. Ei zong va om kha leng " mi zong ciah gai ahih teh, ei zong ciah mai ni" cih kul kha ding hi.

David pen kumpipa khat hi a,a zi neihte a ma ngaih aa a tenpih tam khol lo a hi tam, Mikhail Saul kumpi pa tanu pen a mel hoih ve ve khat, Saul kumpi pa in David a zawhnop man aa, a zawh thawh thu tawh a gawm hi. David in a zi dangte a lak ma sak sak zong mei gong nupi teng kai khawmaa a lak pawlkhat om hi. Tua te lak ah Bethsheba a mei gong na dingin bawlin a mei gong hun ciangin zi a a lak pen Pasian lung kim hetlo hi. 2Samuel 11:1-13.

Hih mun ah Kumpi pa in a kiang ah a zi te khat peuh samsak hen la mipi muh tangpi a hi phial zongin namgawpin luppah leh zong kuain zum kong mang kong tunngam ding hi tuan lo hi. Mawhna tawh a kipelh na dingin a zi te khat peuh om pih den ding hilel hi. Bethsheba in bang hang in kisilna buksung ah kisil lel lo aa, midang muhna ding se se ah kisil hiam? cih zong dot theih ding omhi. A na sem te kiang ah tuanu va sam un a cih ciangin "kumpipa aw kisam theilo ding hi mizi a hi hi" aci ngam ding nasem te lakah a pau hang khatzong ki sam hi. Thu manna a hoih hangin aki lawm hetlo muh gegu, thu hoih,hoihlo thukhempeuh man gaih pongmawk zong hoihkhin sam lo hi.

A sawltak te in samin a om mai ding te ommah khin ta hi. A piang ding teng zong a pian ciangin galmai aa om Bethsheba pasal Uriah ki nawh sapin," na zikiang ah lumin," ciin ki khauh-sawl hi. Galkap mangpa in a hem theih ciangin paulap zongin a zi tawh lum nuamlo sin sen hi. Kumpi pa in a khem zawh nawnloh ciangin galhaksat na ah puakin Uriah pen ki that hi. Uriah a sih a zak ciangin David in Bethsheba a zi ding in lapah buat buat hi. Tua bangin David pen mite nuihsat in hong haitat hi.

Tua ciangin kamsangpa Natan in “Kumpipa aw mihaupa khat in zin nei in a zinte a ma tu te gawhlo in mizawngpan tanu zah a, a ngaihsut a gannoneih sun laksak in a zinpa gawh hi” a cih ciangin Kumpi pa in “Tuapa thatding kilawm hi, koi ah om hiam?” ci hi. Natan in “hiah om hi, nang hi teh” ci hi. “Hit mi Uriah na galkap mangpa Amon mite namsau tawh na that aa, a zi, na zi dingin na la hi. Tua thu hangin na inn sung ah namsau veng ngeilo dinghi, Topa in hih bang in ci hi. Na innsung ah nang ma langah siat na a piang sakding khat ka khangsak ding hi. Nazite na muhtangin la in na vengpa tungah ka pia ding aa, a mah in suntangpi mah in na zite luppah dinghi” ci ek mawk hi.

David in “khial khin ing” ci hi. Kamsangpa in “Pasian in na khialhna ongmaisak hi, a hih hangin nang sung pan aa, a piang nau ngek si ding hi” ci hi.

Mawhna thaman

1> Bethsheba tawh a neih naungek si hi.

2> A tapa Absalom tawh kilangpan na piang in, Absalom kithat hi.

3> Absalom lawmte in David zineu te sun tangpi mah in luppah uh hi.

4> David tapa mah Ammon in Absalom naunu Tamar a luppah manin Absalom in Ammon that hi.

5> David tapa Adonizah pen Solomon tawh kumpi kituh in Solomon in that hi.

Topa in David a mawhna maisak aa, ama tung ah sihna a tun loh hangin a inn sung ah luangthu vi ve thusia om tawn tung hi. Leitung thukhun tuam tuam ah zong mi thah na, mi zi deihgawhna, ngeinalo nu leh pa mawhna te a huamin a kikhawm ve ve a hi hi.